

四庫全書

史部

欽定四庫全書

史部  
隸釋卷二十七  
五至

詳校官編修臣潘庭筠

編修臣程嘉謨覆勘

總校官進士臣繆琪

校對官中書臣李斯咏

謄錄監生臣朱坦

欽定四庫全書

隸釋卷二十五

宋 洪适 撰

郎中馬君碑

武都太守李翕碑

博陵太守孔彪碑

成陽靈臺碑

廷尉仲定碑

故民吳公碑

司隸校尉魯峻碑

桂陽太守周府君頌

周府君碑陰

石經遺字

堂谿典嵩高山石闕銘  
帝堯碑

蒼頡廟碑  
庠彰長斷碑

梁相費汎碑  
堂邑令費君碑

費君碑陰  
太尉陳球碑

華嶽碑  
太尉郭禧碑

郭禧碑陰  
郭禧後碑

樊毅西嶽碑  
禹廟碑

冀州從事郭君碑  
逢童碑

逢童碑陰

穀阮君神祠碑

穀阮君神祠碑陰

無極山碑

揚州刺史敬使君碑

藁長蔡湛頌

蔡湛碑陰

安平相孫根碑

涼州刺史魏君碑

碭孔君神祠碑

成陽令唐君頌

唐君碑陰

白石神君碑

幽州刺史朱龜碑

朱龜碑陰

都鄉正街彈碑

太尉劉寬碑

劉寬碑陰

尉氏令鄭君碑

趙相劉衡碑

陳君碑

陳仲弓碑

陳仲弓碑陰

金石錄中

郎中馬君碑

右郎中馬君碑文字殘缺所可見者字元海而已又云其先賜號馬服因遂氏焉又云以和平元年舉孝廉除郎中

謙虛接下冠名三署又云年卅元嘉三年正月卒又云夫  
人年五十五建寧三年十二月卒其他不可考究矣

武都太守李翕碑

漢時文字多與今隸書不合  
皆依石本錄之

右武都太守李翕碑文字首尾完好云漢武都太守漢  
陽河陽李君諱翕字伯都其後歷叙在郡治蹟云郡西  
碛中道危難阻峻緣崖俾閣兩山壁立隆崇造雲下有  
不測之谿阨窄促迫財容車騎進不能濟息不得駐數  
有顛覆隕墜之害君勅衡官有秩李瑾掾仇審因常繇

道徒鑿燒破析刻白崔嵬減高就埤桺致土石堅固廣大可以夜涉四方無雍行人懽懽民歌德惠穆如清風乃刊斯石其後有頌詩最後題建寧四年六月十三日壬寅造云

博陵太守孔彪碑

右博陵太守孔彪碑歐陽公集古錄云孔君碑者其名字摩滅不可見而世次官閥粗可考云孔子十九代孫頽川君之元子也舉孝廉除郎中博昌長拜尚書侍郎



治書侍御史博陵太守遷下邳相河東太守建寧四年  
十月卒其終始略可見惟其名字皆亡爲可惜也今此  
碑雖殘缺而名字尚完可識云君諱彪字元上又韓府  
君孔子廟碑陰載當時出錢人名亦有尚書侍郎孔彪  
元上與此書正同惟孔君自博陵再遷為河東太守而  
碑額題故博陵太守孔府君碑漢人多如此然莫曉其  
何謂也

成陽靈臺碑

右成陽靈臺碑成陽屬今雷澤碑略云堯母慶都仙歿蓋葬于茲欲人不知名曰靈臺歐陽集古錄以謂自史記地志及水經諸書皆無堯母葬處余按班固西漢劉昭東漢書地理志皆曰成陽有堯冢靈臺而東漢志章帝元和二年東巡狩將至泰山道使使者奉一太牢祠帝堯於濟陰成陽靈臺與章帝紀所載正同帝紀章懷太子注引郭緣生述征記云成陽縣東南有堯母慶都墓上有祠廟堯母陵俗亦名靈臺文母水經注今成陽

城西二里有堯陵陵南一里有堯母慶都陵於城為西南稱曰靈臺蓋兩漢史所載似以靈臺為堯冢惟此碑與述征記水經迺直指為堯冢爾然水經云在成陽西南而述征云在東南未知孰是又集古錄云諸書俗本多作城陽獨此碑為成陽當以碑為正余嘗考之成陽縣名屬濟陰郡城陽乃王國名漢文帝二年以封齊悼惠王子章者漢志所載各異未嘗差誤也碑有廷尉某歐陽公以為姓名摩滅不可讀今驗其缺處姓下隱

隱有定字知其名定而其後云濟陰太守審晃成陽令  
管遵各遣大掾輔助仲君知其姓仲仲氏世為成陽人定  
有墓在雷澤碑尚存其額題漢故廷尉仲君碑有云表

祠唐堯為漢祈福又云為廷尉卿託病乞歸脩堯靈臺  
黃屋世餘上聽拜太中大夫云

余為涇州同官李堯雷  
澤又云冢正在城西南

蓋述征  
記誤也

廷尉仲定碑

右廷尉仲定碑在今濮州雷澤其額題漢故廷尉仲君

之碑碑載官闕甚詳雖殘缺然尚可次第其略云君諱定聖漢龍興家于成陽父張掖廣漢太守以父勲拜琅邪太守南陽陰府君察孝不行南郡胡公除濟陰復舉孝廉拜尚書左丞除郎中遷彭城呂長徵試博士太傅下邳趙公舉君高行遷豫州刺史將軍從事符節令豫章太守徵議郎拜大尚書遜位復徵拜將軍長史遷城門校尉執金吾拜太中大夫遷廷尉卿託病乞歸脩堯靈臺黃屋世餘上聽拜太中大夫臺成事訖上以君先

帝舊臣筴請令州郡以禮特遣熹平元年孟秋上旬君  
遺疾不瘳於是門生養徒故吏鄉黨刊石勒銘樹碑表  
道焉兩漢遷拜次第史既不能詳載而石刻類皆摩滅  
難考今此碑所載詳悉故盡著之所謂南郡胡公者廣  
也太傳下邳趙公者峻也按定漢史無傳惟風俗通元  
和姓纂具載姓名官爵云

故民吳公碑

右吳公碑其額題漢故民吳公之碑碑云熹平元年十

二月上旬吳公仲山其他刻畫完好如新文詞頗拙陋書亦怪而不工然漢時石刻存者漸少而此碑特完故錄之以資博覽

司隸校尉魯峻碑

右司隸校尉魯峻碑云君諱峻字仲嚴鄆道元注水經引戴延之西征記曰焦氏山北金鄉山有漢司隸校尉魯恭冢冢前有石祠四壁皆青石隱起自書契以來忠臣孝子貞婦孔子及七十二弟子形像像邊皆刻石記

之今墓與石室尚存惟此碑為人輦置任城縣學矣余嘗得石室所刻畫像與延之所記合又其他地里書如方輿志寰宇記之類皆作峻惟水經注轉寫為恭爾

桂陽太守周府君頌

右桂陽太守周府君頌歐陽公集古錄云府君字君光而名已訛缺不可辨圖經但云周使君而亦不著其名後漢書又無傳遂不知為何人而曾子固言嘗得此碑於知韶州王之才之才以書來言曲江縣圖經周府君



名昕字君光則永叔云圖經不載其名者蓋考之未詳也今此本雖訛缺然究其點畫殊不類昕字二公所說既不同而韶州圖經余家偶無有皆未可知也

余後見市中印

本歐陽公廬陵集別有一跋尾云周君名憬憬字頗近之

### 周府君碑陰

右周府君碑陰題名凡卅一人姓氏具存按酈道元注水經瀧水南逕曲江縣東縣昔號曲紅曲紅山名也而東西兩漢史皆作曲江今據此碑自縣長區祉而下凡

十七人皆書為曲紅則是當時縣名曲紅無可疑者不知兩漢皆作曲江何也

石經遺字

右石經遺字者藏洛陽及長安人家蓋靈帝熹平四年所立其字則蔡邕小字八分書也其後屢經遷徙故散落不存今所有者纔數千字皆土壤埋沒之餘摩滅而僅存者爾按後漢書儒林傳叙云為古文篆隸三體者非也蓋邕所書乃八分而三體石經乃魏時所建也又按靈

帝紀言詔諸儒正五經文字刻石立於太學門外蔡邕傳乃云奏求正定六經文字既已不同而章懷太子注引洛陽記所載有尚書周易公羊傳論語禮記今余所藏遺字有尚書公羊傳論語又有詩儀禮然則當時所立又不止六經矣洛陽記又云禮記碑上有諫議大夫馬日磾議郎蔡邕等名今論語公羊後亦有堂谿典馬日磾等姓名尚在據邕傳稱邕以經籍去聖久遠文字多謬俗儒穿鑿疑誤後學乃奏求正定自書於碑於是後

儒晚學咸取正焉今石本既已摩滅而歲久轉寫日就訛舛以世所傳經書本校此遺字其不同者已數百言又篇第亦時有小異使完本具存則其異同可勝數邪然則豈不可惜也哉而後世學者於去古數千百歲之後盡絀前代諸儒之論欲以己之私意悉通其說難矣余既錄為三卷又取其文字不同者具列於卷末云

堂谿典嵩高山石闕銘

右堂谿典嵩高山石闕銘云中郎將堂谿典伯并熹平

四年來請雨嵩高廟按後漢書靈帝紀熹平五年復崇  
高山名為嵩高山章懷太子注引前漢書武帝祀中嶽  
改嵩高為崇高東觀記曰使中郎將堂谿典請雨因上  
言改之復為嵩高今此銘乃熹平四年可以正漢史之  
誤又蔡邕傳注引先賢行狀云典字子度而延篤傳注  
又作季度今此碑乃云字伯并亦當以碑為正

帝堯碑

右帝堯碑云帝堯者昔世之聖王也其先出自塊隗翼

火之精有神龍首出于常羊又云名紀見乎河雒爰嗣  
八九慶都與赤龍交而生伊堯又云侯伯遊於玄河之  
上龍龜負銜投鈴受與然後堯乃受命其說出於讖緯  
可謂怪妄不經矣堯之所以為聖者豈假此而已哉

蒼頡廟碑

右蒼頡廟碑文字殘缺其略可辨者有云蒼頡天生德  
於大聖四目靈光為百王作憲而其銘曰穆穆聖蒼知  
為蒼頡碑也考其歲月蓋熹平六年立

庠彰長斷碑

右庠彰長斷碑在華陰已斷裂惟存下一段故其姓名皆亡矣所可見者有云先高祖時以吏二千石自齊臨菑徙充關中祖字興先爲執金吾弟颺漁陽太守又云元初元年遭家不造三歲喪父事母有柴穎之行初仕爲縣主簿功曹郡諸曹史帳下司馬劉君招命署議曹掾假除百石遷補任尉假印綬守廣平夏曲陽令庠彰長熹平二年秋七月寢疾不豫最後題熹平六年十月

九日辛酉造按史記及漢書本紀高祖九年徙齊楚大族昭屈景懷田五姓關中而其四姓皆楚人自齊徙者惟田氏爾然則此碑所謂高祖時自齊臨菑徙者其人必姓田氏也

按第五氏亦云自齊徙關中然本亦出于田氏也

序彰東西漢史

皆作斥章

梁相費汎碑

右費汎碑在湖州其額題漢故梁相費君之碑碑云梁相諱汎字仲慮此邦之人也其先季文為魯大夫有功



封費因以為姓秦項兵起避地於此遂留家焉余家所  
收姓氏文字粗備以諸書參考頗多牴牾不合姓苑云  
費氏禹後漢有長房蜀志有丞相禕又云今琅邪亦有  
此姓音父位反李利涉編古命氏云費氏出自魯桓公  
少子季友有勲於社稷賜汶陽之田封邑於費子孫氏  
焉漢有費將軍其後有費忠費柔適蜀為寧蜀人忠之  
孫徙於荊州後遷江夏忠十代孫奕奕孫禕又家於蜀  
晉平蜀禕之子承復歸江夏林寶元和姓纂云費氏亦

音祕史記紂幸臣費中夏禹之後楚有無極漢有直蜀  
有禕晉有詩又云琅邪費氏直之後也陳湘姓林云費  
氏音蜚夏禹之後余嘗考之此字有兩姓音讀不同源  
流亦異其一音蜚嬴姓出於伯翳史記所載費昌費中  
楚費無極漢費將軍費直費長房蜀費禕之徒是其後  
也其一音祕姬姓出於魯季友姓苑所載琅邪費氏而  
此碑所謂梁相費君是其後也然則姓苑姓纂姓林皆  
云夏禹之後姓纂又云亦音祕及謂琅邪費氏為直之

後皆其差誤而編古命氏以費將軍費禕之徒出於魯季友亦非也余又按春秋僖公賜季友汶陽之田及費而左傳亦以謂季友有功於魯受費以為上卿今以為季文有功封費者蓋碑之誤

堂邑令費君碑

右堂邑令費君碑云惟熹平六年無射之月堂邑令費君寢疾卒嗚呼哀哉於是夫人元弟卜胤追而誄之其後有銘詩碑所述費君事不甚詳悉而其名字世次官

秩具載於碑陰今附於後

費君碑陰

右費君碑陰云君諱鳳字伯蕭梁相之元子九江太守之長兄也世德襲爵銀艾相亞又云君踐郡右職三貢獻計漢安二年吳郡太守東海郭君以君有委蛇之節自公之操年卅一舉孝廉拜郎中除陳國新平長遂宰堂邑其後為五字韻語詞頗古雅而時時殘缺不可次叙其前題君甥家中孫甘陵石勳字子才所述云

太尉陳球碑

右太尉陳球碑球有兩碑皆在下邳其一已殘缺此碑  
差完可考前代碑碣與史傳多牴牾而球碑所載官閥  
事跡與傳合東漢之末政在閹寺威福下移其勢蓋可  
畏也而一時衆君子猶奮不顧身力排其姦雖遭屠戮  
而不悔志雖不就然亦可謂壯哉如球是已使當時士  
大夫能屈已以事之則富貴可長保矣然君子固未肯  
以彼而易此也

華嶽碑

右華嶽碑集古錄云碑以周禮職方氏為識方氏者疑當時周禮之學自如此蓋識誌其義通也余按袁逢華嶽碑亦引職方氏乃用職字蓋漢人簡質字相近者輒假借用之初無意義爾

太尉郭禧碑

右太尉郭禧碑文字殘缺所存纔百許字其可見者公諱禧字君房而已禧郭躬從孫也其事迹附見躬列傳

云少明習家業兼好儒學有名譽延熹中為廷尉建寧  
二年代劉寵為太尉而靈帝紀亦云是年十一月禧為  
太尉章懷太子注云字公房扶溝人也郭氏世為陽翟  
人自躬以下皆葬陽翟其墓尚存今此碑缺處猶有陳  
留扶溝字疑禧嘗寓居是邑其卒也返葬故郡而漢書  
注遂以為扶溝人恐誤

郭禧碑陰

右郭禧碑陰其首有四大字云故吏人名其下列故吏

密張立度成匱師張恂子道維陽李蒼子考故民河南  
陰德紀信以下凡百餘人又有右河南右河內郡右弘  
農郡右扶風字字畫完好者甚多筆法淳古可愛

郭禧後碑

右郭禧後碑殘缺尤甚其略可辨者云惟光和二年夏  
五月甲寅太中大夫故太尉郭公薨又云公之胤子故  
五原太守餘不復成文而其額題漢故太尉郭公神道  
字畫尚完云後漢書列傳既不載禧所終而靈帝紀但



云建寧三年夏四月太尉郭禧罷亦不言其為何官今以碑考之乃知其罷為太中大夫而卒於光和二年也五原太守名鴻後為司隸校尉封成安鄉侯

### 樊毅西嶽碑

右樊毅西嶽廟碑云弘農太守河南樊君諱毅歐陽文忠公集古錄云據此碑乃即時所立而太守生稱諱者何哉按春秋左傳周人以諱事神名終將諱之而禮卒哭乃諱鄭氏以謂敬鬼神之名也諱避也生者不相避

名衛侯名惡大夫有石惡君臣同名春秋不非又漢宣帝元康二年詔曰聞古天子之名難知而易諱也今上書觸諱以犯罪者朕甚憐之其更諱詢諸觸諱在令前者赦之蓋卒哭而諱其名實始於周而生死皆稱諱西漢已如此矣然則生曰名死曰諱又出於近世也有以見後世忌諱愈密如此然生而稱諱見於石刻者甚衆不獨此碑也

禹廟碑

右禹廟碑云光和二年十二月丙子朔十九日甲午皮氏長南陽章陵劉尋孝嗣丞安定烏氏樊璋元孫其後叙禹平水土之功而最後有銘文多殘缺不能盡識碑在龍門禹廟

冀州從事郭君碑

右郭君碑名字已殘缺其額題曰冀州從事郭君之碑碑云其先出高辛興自於周

闕一字

蕃虞郭在河魏之間

遭晉荒疆乃喪厥土亦世孳孳職思其勲子孫纓布家

於樂土因國為氏又云歷郡諸曹掾史主簿督郵五官掾功曹又云光和二年終三年十月葬又云哀哀考妣追惟實靈卜商號咷喪子失明據此乃父母生而稱考妣也爾雅云父為考母為妣郭璞注引禮記生曰父母妻終曰考妣嬪今世學者從之而璞援據諸書以為非生死之異稱猶今謂兄為舅妹為媚爾今此碑漢人所為已不用戴氏之說以此知璞為有據然禮經行於世久既有此論事親者所當避也

逢童碑

右逢童碑刻畫完好云童子諱盛字伯彌薄令之玄孫  
遂成君之曾孫安平君之孫五官掾之長子也又云年  
十有二歲在協洽五月乙巳噓喻不反夭隕精晃於是  
門生東武孫理下密王升等共刊石叙述才美以銘不  
朽焉其後題光和四年四月五日丁卯立碑舊在濰州  
昌邑縣近歲移置郡中云

逢童碑陰

右逢童碑陰題云右家門生右縣中士大夫凡十三人有督郵璉敏賓璉后升司文叔盛姓字按璉與司文姓氏書皆不載今誌於此

穀阮君神祠碑

右穀阮君神祠碑歐陽公集古錄云穀阮君祠今謂之五部神廟其像有石隄西戍樹谷五樓先生東臺御史王翦將軍莫曉其義今此碑有云石堤樹谷南通商維又云前世通利吏民興貴有御史大夫將軍牧伯故為

立祠以報其功乃知石堤樹谷御史將軍之號自漢以  
來有之流俗相傳其所從來遠矣而水經鄭縣城南山  
北有五部神廟前有碑光和四年鄭縣令河東裴君水  
字君先立又知五部神自齊魏間已有此號矣裴君水  
經以為名畢而集古錄云名瞻今詳其點畫頗近畢字  
疑集古錄誤

穀阮君神祠碑陰

右穀阮君神祠碑陰縣吏及鄉人題名其完好可識者

二百餘人摩滅者又百餘人小字淳勁可喜歐陽公集  
古錄所未嘗有也

無極山碑

右無極山碑按顏之推家訓曰詩云有滄萋萋興雲祁  
祁毛傳云滄陰雲貌萋萋雲行貌祁祁徐也箋云古者  
陰陽和風雨時其來祁祁然不暴疾也按滄已足陰雲  
何勞復云興雲祁祁雲當為雨俗寫誤爾班固靈臺  
詩云習習祥風祁祁甘雨此其證也據此則本作雲字



之推改為雨耳而陸德明經典釋文亦云本作興雲非也蓋德明據顏氏說改之故後來本皆作雨今此碑銘文有曰興雲祁祁雨我公田遂及我私乃知漢以前本皆作興雲顏氏說初無所據特私意耳

揚州刺史敬使君碑

右敬使君碑在河東平陽其額題云漢揚州刺史敬君之銘碑已殘缺其名字皆亡略可辨者嘗辟司隸從事又為治書侍御史最後云年五十三光和四年閏月遭

疾而卒其他不復可考按姓苑載風俗通有敬歆漢末  
為揚州刺史元和姓纂亦云歆平陽人而後周書敬珍  
傳唐書宰相世系表歆皆作韶余後得後魏敬曦造像  
碑亦作韶乃知姓苑姓纂之謬又集古錄此碑凡再出  
其一題敬仲碑云名字已摩滅獨首有敬仲字故寓其  
名爾疑其人姓田也其一題無名碑所載事皆同蓋歐  
陽公未嘗見額爾

橐長蔡湛頌

右橐長蔡君頌云君諱湛字子德河內脩武人也又云  
舉孝廉辭讓應司徒府除廣川長復辟太尉熹平四年  
六月詔書其下斷缺似是叙述遷橐長及在官政績又  
云三年遷高邑令吏民追思於是故吏栗尹等相與合  
會立碑起頌刊斯石焉其後有銘最後題光和四年十  
二月詔書遷并州刺史其大略如此其他文字殘缺不  
可考矣

蔡湛碑陰

右蔡湛碑陰載出錢人名有故吏賤民議民故三老故處士義民其稱故吏義民之類他漢碑多有之唯議民賤民獨見於此碑然莫詳其義

安平相孫根碑

右安平相孫根碑云府君諱根字元石司空公之伯子樂安太守之元子漢陽太守侍御史之兄乘氏令之考厥先出自有殷玄商之系子湯之苗又云聖武定周封干之墓脣裔分析避地匿軌姓曰孫焉又云遷鄆長雍

奴令換元氏考城令諫議大夫拜議郎謁者遷荊州刺  
史徵拜議郎遷安平相年七十有一光和四年十二月  
乙巳卒碑在今高密縣所謂司空公者桓帝紀永壽三  
年太常孫朗為司空注云朗字代平北海人漢三公名  
亦云朗北海高密人余嘗觀漢時碑碣載其家世皆止  
書官爵蓋為子孫作銘不欲名其父祖爾此最為得體  
然非當代顯人則遂莫知其為何人也又按姓苑姓纂  
諸書皆云孫氏周文王子衛康叔之後衛武公子爾為

衛上卿因氏焉今此碑乃云出於商比干之後蓋古人或因賜姓命氏或以官或以謚或以封或以居或以王父字為氏故姓氏雖同而源流或異書傳闕漏不載者多矣

涼州刺史魏君碑

右涼州刺史魏君碑文字殘缺族系名字皆不可考其粗可見者察孝廉除郎中尚書侍郎右丞卒於光和四年而其額題涼州刺史魏君碑云

碭孔君神祠碑

右碭孔君神祠碑其前題漢故行梁相事碭孔君之神祠文詞字畫皆古怪而不工又時有難曉處刻畫甚完孔君者名耽字伯本

成陽令唐君頌

右成陽令唐君頌云君諱扶字正南字畫尚完而歐陽公集古錄乃云其名殘缺何哉碑額題漢故成陽令唐君之頌在今濮州雷澤縣古成陽也

唐君碑陰

右唐君碑陰載出錢造碑人有故從事故督郵故吏處士門生門童等姓名按唐君碑云處士閻葵斑等刻石樹頌而碑陰又有故吏閻葵已處士閻葵楚閻葵姓不見於前史而姓苑姓纂之類亦皆不載蓋前代氏族或因改易或寢微不顯遂泯沒而無傳者甚衆今世所有姓氏書類多簡略不完惟時時見於石刻者余每記之以裨姓氏書之闕云



白石神君碑

右白石神君碑其略云白石神君者居九山之數參三  
條之一兼將軍之號秉斧鉞之威體連封龍氣通北嶽  
幽讚天地長育萬物觸石而起膚寸而合不終朝日而  
澍雨沾洽前後國縣屢有祈請指日刻期應時有驗猶  
自挹損不求禮秩縣界有六名山三公封龍靈山先得  
法食去光和四年三公守民蓋高等始為無極山詣太  
常求法食相縣以白石神君道德灼然乃具載本末上

尚書求依無極即蒙聽許於是遂開拓舊兆改立殿堂其餘首尾尚皆完好可讀文多不備載其曰居九山之數參三條之一莫曉為何語也

幽州刺史朱龜碑

右幽州刺史朱龜碑在今亳州酈道元注水經云渦水東逕朱龜墓北東南流冢南枕道有碑題云漢故幽州刺史朱君之碑龜字伯靈光和六年卒官今以碑考之與道元所載皆合歐陽公集古錄云龜之事跡不見史

傳獨見於碑爾余按後漢書西南夷傳熹平五年諸夷反叛執蜀郡太守雍陟遣御史中丞朱龜討之不能克太尉掾李顥建策討伐乃以顥為益州太守發板楯蠻擊破平之常璩華陽國志亦載其事與史同惟史與華陽國志皆言龜不能克而碑云蠻夷授首乞降二說不同疑碑所書非實錄也

朱龜碑陰

右朱龜碑陰文字殘缺初余讀酈道元注水經云朱龜

碑陰故吏名姓多上谷代郡人知此碑有陰因託人就  
亳社摸得之附於碑後

都鄉正街彈碑

右都鄉正街彈碑在汝州界故昆陽城中文字摩滅不  
可考究其歲月略可見蓋中平二年正月而其額題都  
鄉正街彈碑莫知其為何碑也

太尉劉寬碑

右太尉劉寬碑寬有兩碑皆在洛陽上東門外官道傍

此碑據藝文類聚乃栢麟撰後碑不知何人所為然字體則同也

劉寬碑陰

右劉寬碑陰寬兩碑皆有陰此後碑陰也唐咸亨中碑仆於野其裔孫周王記室參軍爽字元爽重為建立寬以中平二年卒據靈帝紀以光和七年十二月改元中平以歷推之是歲甲子至明年當為乙丑而爽書為甲子誤矣

尉氏令鄭君碑

右尉氏令鄭君碑云君字季宣聘君之孫而其名已殘缺其他字畫時有可識處皆斷續不成文理略可見者年五十有七卒於中平二年而碑陰題尉氏故吏處士人名知其為尉氏令爾

趙相劉衡碑

右趙相劉衡碑云君諱衡字元宰濟南東平陵人也厥先尚矣聖漢龍興其下殘缺又云爰啓奠土遷於岱陰

自康侯以來奕世丕承又云敷海王帝之冢弟不遵憲  
典君以特選為郎中令以兄琅邪相憂即日輕舉州察  
茂材除脩令遷張掖屬國都尉以病徵拜議郎遷東

東

闕一

字屬國都尉不行拜趙相在位三歲拜議郎年五十

有三以中平四年二月戊午卒其四月己酉葬其餘文  
字完好者尚多按後漢書敷海王名悝桓帝弟也衡墓  
與碑在今齊州歷城縣界中古平陵城傍余嘗親至墓  
下觀此碑因模得之墓前有石獸制作甚工云

陳君碑

右陳君碑文字殘缺不完其略可識者云君諱度字妙高陳國相人又云武王克商封先代之後以元女大姬配胡公至厲公生公子完奔齊其後斷續不復成文而最後題中平四年九月廿一日巳丑立云

陳仲弓碑

右陳仲弓碑其額題云漢文範先生陳仲弓之碑碑文已漫滅蔡邕字畫見於今者絕少故雖漫滅之餘尤為



可惜以校集本不同者已數字惜其不完也按邕集仲  
弓三碑皆邕撰其一碑云中平三年秋八月丙子卒三  
碑皆云春秋八十有三後漢書仲弓傳以為中平四年  
年八十四卒於家者疑傳誤

陳仲弓碑陰

右陳仲弓碑陰故吏姓名多已刊缺蔡邕小字八分惟  
此與石經遺字爾石經字畫謹嚴而此碑尤放逸可愛

隸釋卷二十五

欽定四庫全書

隸釋卷二十六

宋 洪适 撰

陳仲弓壇碑

圉令趙君碑

周公禮殿記

巴郡太守樊君碑

綏民校尉熊君碑

司空宗俱碑

馮使君墓闕銘

高陽令楊君碑陰

浚儀令衡君碑

光祿勳劉曜碑

張侯殘碑

荊州從事苑鎮碑

趙相雖府君碑

三公碑

酸棗令劉熊碑

臨朐長仲君碑

司空殘碑

益州太守楊宗墓闕銘

益州刺史薛君巴郡太守劉君碑

巴郡太守張君碑

禹廟碑

禹廟碑陰

武氏石室畫像

戚伯著碑

四皓神位刻石

相府小史夏堪碑

郭先生碑

魏大饗碑

魏孔子廟碑

范式碑

金石錄下

陳仲弓壇碑

右陳仲弓壇碑其額題故太丘長潁川陳君壇其他文字磨滅不可盡識按蔡邕集有仲弓三碑以集本校之此碑非邕撰者然字畫亦奇偉惜其殘缺不完也

園令趙君碑

右園令趙君碑其額題漢故園令趙君之碑而最後題  
初平元年十二月二十八日立碑已訛缺名字皆不可考  
所可見者有云郡仍署五官掾功曹州辟從事司徒楊公  
辟遷園令播德二城風曜穆清被疾去官年六十有八以  
中平五年冬十一月卒後有銘詩特完好其辭云天寔高  
惟聖同戲我君羨其縱體弘仁蹈中庸所臨歷有休功追  
景行亦難雙刊金石示萬邦其詞頗爾雅故錄之

周公禮殿記

右周公禮殿記者今成都府學有漢時所建舊屋柱皆  
正方上狹下闊此記在柱上刻之靈帝初平五年立距  
今蓋千年矣而字畫完好可讀當時石刻在者徃徃摩  
滅此記託於屋楹乃與金石爭壽亦異矣記有云甲午  
年故府梓潼文君增造吏舍二百餘間按華陽國志有  
文參字子竒梓潼人平帝時用為益州太守不從王莽  
公孫述光武嘉之疑此記所載即其人也蓋光武建武

十年歲次甲午云

巴郡太守樊君碑

右巴郡太守樊君碑云君諱敏字升達肇祖宓戲遺苗  
后稷為堯種樹舍潛於歧天顧亶甫乃萌昌發周室衰  
微霸伯匡弼晉為韓魏魯分為楊充曜封邑厥土河東  
楚漢之際或居於楚或集於梁君纘其緒華南西亶又  
云總角好學治嚴氏經貫穿道度無丈不睹於是國君  
備禮招請濯冕題冠傑立忠蹇有夷史之直卓密之風



鄉黨見歸察孝除郎永昌長史遷宕渠令大將軍辟光  
和之末京師擾攘雄狐綏綏冠履同囊投核長驅畢志  
枕丘國復重察辭病不就再奉朝聘七辟外臺常為治  
中諸部從事又云季世不祥米巫凶瘡姦校並起諂附  
者衆君執一心賴無汙恥復辟司徒道隔不徃牧伯劉  
公表授巴郡以助義都尉養疾閭里又行褒義校尉年  
八十有四歲在汙協紀驗期臻奄忽感形其後有銘最  
後題建安十年二月上旬造他漢碑類多刊缺而此碑

獨首尾完好故載其大略於此米巫凶瘡者謂張角也

綏民校尉熊君碑

右熊君碑其名字皆殘缺其額題漢故綏民校尉騎都尉桂陽曲紅灌陽長熊君之碑初余得桂陽太守周君碑陰據水經注以為曲江漢時本名曲紅今此碑及額亦皆作紅乃知酈道元為有據也

司空宗俱碑

右司空宗俱碑云公諱俱字伯儷南陽安衆人也而其

額題漢故司空宗公之碑按後漢書宋均傳均族子意  
意孫俱靈帝時為司空余嘗得宗資墓前石獸膊上刻  
字因以後漢帝紀及姓苑姓纂等諸書參考以謂自均  
而下其姓皆當作宗而列傳轉寫為宋誤也後得此碑  
益知前言之不謬碑已殘缺不成文理而官秩姓名鄉  
里特完可考故詳著之

馮使君墓闕銘

右馮使君墓闕銘云故尚書侍郎河南京令豫州幽州

刺史馮使君神道按漢書馮緄傳緄父煥安帝時為幽州刺史而緄碑亦云幽州君之元子此字在宕渠緄墓前雙石闕上知其為煥闕也

高陽令楊君碑陰

右高陽令楊君碑陰歐陽公集古錄云余家集錄得楊震墓域中漢碑四震及沛相繁陽高陽令碑并得碑陰題名然得時參錯不知為何碑之陰也集古所有余盡得之又各以碑陰附於碑後其曰懷陵園令蔣禧字武

仲者沛相碑陰也其曰故吏故民故功曹史故門下佐者繁陽令碑陰也其曰右後公門生右沛君門生者高陽令碑陰也

浚儀令衡君碑

右浚儀令衡立碑云君諱立字元節其先出自伊尹而其銘曰於穆從事歐陽公集古錄號為元節碑且云疑其姓伊而為從事也今碑首尚完題浚儀令衡君之碑蓋漢時石刻其官爵姓氏既載於額則其下不復更著

苟文已殘缺又不見其額則遂難考究矣立與衛尉卿  
衡方墓皆在今鄆州中都方碑亦云其先伊尹號稱阿  
衡因以氏焉

光祿勳劉曜碑

右光祿勳劉曜碑集古錄云君諱曜字季尼年七十三  
其餘爵里官闕卒葬歲月皆不可見今此碑雖殘缺然  
尚有可考處蓋孝文之裔又嘗為太官令郎中居延都  
尉太宗正衛尉遂為光祿勳至於卒葬年月則斷續不

可考矣

張侯殘碑

右張侯殘碑張侯者子房也碑已斷裂摩滅不可次叙  
獨其額尚完題漢故張侯之碑在今彭城古留城子房  
廟中驗其字畫蓋東漢時所立樂史寰宇記陳留縣有  
張良墓引城冢記云張良封陳留侯食邑小黃一萬戶  
漢為良築城因名張良城今陳留有子房廟廟貌甚盛  
余按西漢書地里志注留屬陳故稱陳留宋亦有留彭

城留是也子房傳曰始臣起下邳與上會留臣願封留足矣下邳與彭城相近而此碑漢人所立乃在彭城然則子房所封非陳留明矣城冢記誕妄蓋不足信也

荊州從事苑鎮碑

右苑鎮碑其略云漢故荊州從事苑君諱鎮字仲弓南陽人也其先出自苑柏何為晉樂正世掌朝禮之制又云有苑子園寔能掌陰陽之理即其胄也按姓氏書皆云苑氏出於左傳所載齊大夫苑何忌之後今此碑所



謂苑柏何與子園左傳國語皆無其人故錄之以待知者

趙相雒府君碑

右趙相雒府君碑其前歷叙家世官爵而所述雒君事甚略云趙國相名勸孝廉成臯令趙國相又云在官五載莅政清平有甘棠之化年卅五卒於官故吏民漢中太守邯鄲某等其名殘缺慕戀恩德刊石稱頌焉又有闕銘題漢故趙國相雒府君之闕云

三公碑

右三公碑歐陽公集古錄有北嶽碑云文字殘缺尤其  
其可見者曰光和四年以此知為漢碑爾其文多言珪  
幣牲酒黍稷豐穰等事其後二人姓名偶可見云南陽  
冠軍馮巡字季祖甘陵夏方字伯陽余嘗託人於北嶽  
訪求前代刻石幾盡獨無漢碑今此碑所書事及二人  
姓名與集古所載皆同又光和四年立惟其額題曰三  
公之碑而集古以為北嶽碑豈歐陽公未嘗見其額乎

三公者山名其事亦載於白石神君與無極山碑三山皆在真定元氏云

酸棗令劉熊碑

右劉熊碑在今酸棗縣云君諱熊字孟孟下闕一字按酈道元水經酸棗城內有漢縣令劉孟陽碑今據碑熊實為此縣令然則所闕一字當從水經為陽也碑又云君光武皇帝之玄孫廣陵王之孫俞鄉侯之季子也按後漢書光武子廣陵思王荆以譴死顯宗封其子元壽

為廣陵侯又封元壽弟三人皆為鄉侯而李利涉編古  
命氏唐書宰相世系表皆云荆生俞鄉元侯平生彪  
襲封今據熊當為彪之弟然則於光武乃其曾孫而曰  
玄孫者疑碑誤

臨朐長仲君碑

右臨朐長仲君碑文字摩滅其粗可考者云君諱雄又  
云歷郡五官掾功曹史辟從事舉孝廉除郎中遷臨朐  
長而其額題故臨朐長仲君碑云

司空殘碑

右司空殘碑政和乙未歲得於洛陽天津橋之故基首尾已不完所存四十五字字畫竒偉其詞有云命爾司空余回爾輔據此乃嘗為三公蓋當時顯人惜其不見名氏也碑陰有故吏題名百餘人尤完好筆法不減蔡邕石經云

益州太守楊宗墓闕銘

右楊宗墓闕銘在蜀中凡十六大字云漢故益州太守

楊府君諱宗字德仲墓闕汶陽李長茂為蜀使者罷歸以此本見遺長茂名公年東州善士以畫山水著稱者

益州刺史薛君巴郡太守劉君碑

右薛君碑已斷裂不完惟存上一段而其額尚全題漢故益州刺史中山相薛君巴郡太守宗正卿成平侯相劉君碑古無兩人共立一碑者惟見於此爾

巴郡太守張君碑

右巴郡太守張君碑其前題巴郡太守都亭侯張府君

功德叙云君諱訥字子朗勃海南皮人也又云炎漢龍  
興留侯維幹枝裔滋布並極爵秩又云察孝廉除郎中尚  
書侍郎遷甘陵寃句令親病去官辟司空司徒府復辟  
太尉舉高第拜侍御史揚州寇賊陸梁作難五府表君  
中丞督捕又云丙子璽書封都亭侯碑無卒葬年月其  
後頗叙述政績而繫以銘詩蓋巴郡太守德政碑爾按  
漢史自安順以來揚州寇賊屢發不知張君為中丞督  
捕在何年也

禹廟碑

右禹廟碑字畫淺細故摩滅尤甚其事跡歲月皆不可  
考略可見者云皮氏長安定蘇而名字亦不能辨矣

禹廟碑陰

右禹廟碑陰自侯長汾陰趙遺子宣而下凡數十人姓  
名官爵具存又有故督郵曹史縣功曹鄉部吏柏昱等  
人名最後有龍門復民廿五戶人名在今龍門禹廟殘  
碑之陰而集古錄云在閩鄉楊震墓側又云楊氏子孫



當時皆葬閩鄉碑碣徃徃摩滅此不知為誰碑者蓋誤也

武氏石室畫像

右武氏石室畫像五卷武氏有數墓在今濟州任城墓前有石室四壁刻古聖賢畫像小字八分書題記姓名徃徃為贊於其上文詞古雅字畫遒勁可喜故盡錄之以資博覽

戚伯著碑

右戚伯著碑首尾摩滅其略可見者有云充列王室遇  
謗於呂委位捐爵而其額題周末嗣戚氏襲以興勃海  
君玄孫伯著之碑知其姓氏戚以文詞字畫驗之疑東  
漢中葉以前人蓋當時石刻見於今者多類此所謂充  
列王室遇謗於呂者戚夫人也

四皓神位刻石

右四皓神位神胙几刻石四在惠帝陵傍驗其字畫蓋  
東漢時書按顏師古匡謬正俗引圜稱陳留風俗傳自

序云圈公之後圈公為秦博士避地商山漢祖聘之不  
就惠太子即位以圈公為司徒自圈公至稱十一世按  
班固述四皓但有園公非圈公也云當秦之時避地入  
商洛深山則不為博士明矣又漢初不置司徒安得以  
圈公為之乎稱之說實為鄙野余嘗疑稱著書自述其  
世系不應妄誕如此及得四皓刻石見其所書亦為圈  
公乃知稱所述果非臆說蓋當時所傳如此爾至謂圈  
公為秦博士及惠帝時拜司徒者疑無所據

相府小史夏堪碑

右相府小史夏堪碑云夏堪字叔德帝禹之精苗零陵太守之根嗣也後有銘銘三字語頗古其卒葬年月殘缺字雖不工然漢碑也其曰精苗根嗣漢末人為文喜造語多類此

郭先生碑

右郭先生碑集古錄以為漢碑按後魏酈道元注水經具載此碑云碑無年號不知何代人然則歐陽公何所

據遂以為漢人乎余以字畫驗之疑魏晉時人所為既無歲月可考姑附於漢碑之次云

魏大饗碑

右魏大饗碑按魏志文帝以建安廿五年嗣位為丞相魏王改元延康夏六月南征秋七月甲午軍次於譙大饗六軍及譙父老今以碑考之乃八月辛未蓋魏志誤也是時丕為丞相漢獻帝猶在位雖政去王室已久然操之死纔數月爾丕軍次舊里初無念親之心方與羣

臣百姓置酒高會大設伎樂而臣下又相與伐石勒詞  
夸耀功德更以夏啓周成漢高祖光武為比豈不可笑  
也哉

魏孔子廟碑

右魏孔子廟碑按魏志文帝以黃初二年正月下詔以  
議郎孔羨為宗聖侯奉孔子之祀及令魯郡脩舊廟今  
以碑考之乃黃初元年又詔語時時小異亦當以碑為  
正

范式碑

右范式碑法書要錄云蔡邕書今以碑考之乃魏青龍三年立非邕書也

有錄無說者

章和石記

章和二年

窆石銘

永建元年

河東地界石記

延熹四年

堵陽長謁者劉君碑

建寧元年

仲君碑

建寧五年

郎中王君碑

光和元年

南武陽墓闕銘

元和三年

潁陽令宋君殘碑

陽都長徐君冢闕銘

魯相謁孔子碑

張公廟碑

逢君殘碑

山陽卒史司馬留碑

首山復民碑

首山復戶姓名

鍾君碑

史晨孔廟碑

建寧元年四月

史晨孔廟後碑

建寧二年三月

孔德讓碣

樊安碑

韓府君孔廟後碑

韓府君孔廟後碑陰

孫叔敖碑

桐栢廟碑



祝睦碑

祝睦後碑

堯廟碑

堯廟碑陰

張壽碑

張表碑

劉脩碑

北軍中候郭君碑

郝閣頌

婁壽碑

繁陽令楊君碑

楊君碑陰

陳球後碑

陳球碑陰

西嶽復民賦碑

郭究碑

劉寬後碑

劉寬前碑陰

譙敏碑

武榮碑

楊震碑

楊震碑陰

高陽令楊君碑

楊君碑陰

高君墓闕銘

武陰令高君墓闕銘

富春丞張君碑

不其令董君闕

仙人唐君碑

督郵斑碑

殘碑四

韓明府孔廟碑陰

沛相楊君碑陰

李翕碑陰

孔彪碑陰

靈臺碑陰

帝堯碑陰

郭禧後碑陰

孫根碑陰

尉氏令鄭君碑陰

綏民校尉熊君碑陰

宗俱碑陰

劉熊碑陰

司空殘碑陰

右趙氏金石錄三卷趙君名明誠字德夫密州諸城人故相挺之子也所藏三代彝器及漢唐前後石

刻為目錄十卷辨證二十卷其稱漢碑者百七十有

七其陰四十今出其篆書者十四

張平子碑後碑殘碑山陽麟鳳贊宗

資墓天祿辟邪字琅邪相王君墓闕銘逢府君墓石柱文永樂少府賈君闕銘蜀郡太守任君神道蜀郡

都尉王君神道小黃令闕南陽太守秦君碑額河南尹蘇君碑額司空掾陳君碑額非東漢者

二車騎將軍闕銘膠東令廟門碑隸釋所闕者蓋未判也掇其說載

之趙君之書證據見謂精博然以衛彈為街彈以縣

竹令為縣令之類亦時有誤者紹興中其妻易安居

士李清照表上之趙君無嗣李又更嫁其書行於世

而碑亡矣

隸釋卷二十六

欽定四庫全書

隸釋卷二十七

宋 洪适 撰

天下碑錄

漢陳留太守程封碑

在開封府封丘縣東二里墓下

漢酸棗令劉熊碑

在本縣古城內按其文熊字孟陽仕酸棗令百姓刻石紀績有陰記立碑

故吏姓名

漢執金吾高裒碑

在雍丘縣南五里善鄉墓下

漢太尉高峻碑

在雍丘縣

漢三老袁良

一作貢

碑

在太康縣圍城鎮西南三十里扶樂城石牛廟又云在縣西北三十

里陽夏鄉墓下永建六年卒葬於此

漢袁騰碑

貢之中子也  
在太康縣

漢西平令楊期碑

在尉氏縣西南四十里三亭鄉楊方村墓南二十步文字摩滅唯有首尾

漢征西大將軍楊瑾碑

在尉氏縣三亭鄉路村

漢邊韶碑

在開封縣東北五里墓前蔡邕所書今亡

漢邊讓碑

在開封縣



漢董襲碑

在開封縣東北墓前

魏隱士程冲碑

在封邱縣按程隱君墳在縣西南四里碑當在墓下

魏酸棗令毋邱悅碑

在本縣廢縣內按其文悅字抱僖魏正元年三任酸棗令民為立碑

魏征虜將軍南州刺史王賢思碑

按圖經賢思名亮碑在雍邱縣北五十里

義縣鄉墓下

魏御史大夫袁渙碑

在太原縣

魏鍾繇碑

在尉氏縣西北三十里蔣城鄉高蕪村今割屬中牟按中牟圖經云鍾城在尉氏西北三

十五里有鍾繇古碑斷折文字磨滅

魏何伯申碑

在陳留縣東三十五里

魏徐州刺史韓陵碑

在東明縣南二十里

漢八都神廟碑

在鎮州元氏縣西北二十里廟壇下光和中立

漢封龍山碑二

在獲鹿縣南四十五里山上延熹七年立

漢藁城縣長蔡湛碑

在本縣西二十五里光和四年立

漢無極山碑

在元氏縣西北十里無極山下建安四年立

漢無極山神廟碑

光和四年

漢上谷太守張禰碑

在定州安喜縣東六里

漢孝子王立碑

在安喜縣東三十里

魏中山太守常通碑

在州城西北三里

漢北嶽碑

漢敏勗碑

在冀州

漢熊敏碑

在棗強縣

漢賈敏碑

在棗強縣東北三十里

漢張公神碑

在通利軍衛縣和平元年

漢李固碑

在懷州山陽城內

金史卷之二十七  
漢劉班碑

魏文帝為兗州刺史封為白馬侯在澶州縣三十里墓下

漢左伯桃碑

在安肅軍安肅縣西十五里墓前

魏張文簡碑

在湯陰縣西一百步

魏劉盆碑

在祁州梁澤縣正始二年立在墓側

漢蘇武功碑

在京兆府武功縣墓下

漢太守樊演碑

在河中府臨晉縣內墓前

漢乞復華下民租田筭狀

樊毅奏唐盧做重立  
在華州華陰嶽廟內

漢司徒劉竒碑

在華陰縣

漢西嶽華山亭碑

樊毅光和元年  
在華陰縣

漢西嶽華山廟碑

并陰在華陰縣  
袁逢延熹四年

漢劉黨碑

在華陰縣墓  
下文字摩滅

漢穀坑君神祠碑

裴騰君光  
立在華州

漢石闕銘

永和元年常山太守造  
在華州華陰祠後苑中

漢太尉楊震碑

在闕鄉縣西十五里以來  
孫沛相統門人立在墓前

漢高陽令楊君碑

門人立  
在闕鄉

漢繁陽令楊君碑

故吏立在闕鄉墓  
前富波君少子

漢金城太守楊統碑

在闕鄉墓前

漢李翕碑

在成都崖石上字皆完好有甘露白鹿黃龍連理木四物圖記李翕之政治也

漢郭有道碑

在太原府平晉縣蔡邕文并書在龍泉側

魏馮勅碑

在潞州上黨縣南墓下

魏陸嚴碑

在上黨縣西墓下

魏并州刺史王垣碑

在絳州絳縣東南二里墓旁

漢敬歆碑

在正平縣北二十里墓側

漢郭林宗碑

在汾州介休縣墓側

魏車騎將軍穆祚碑

在介休縣南墓下

漢山陽太守祝睦碑二

在應天府虞城縣東二里

漢丁儀碑

在虞城縣墓前

漢陽翟令許叔臺碑

在柘城縣西南光和中立

漢兗州從事丁仲禮碑

在楚丘縣北三里

漢太尉掾橋載碑

在宋城縣五里

漢繹幕令碑

在宋城縣東

漢橋玄碑二

在宋城縣漢朝羣儒感橋氏德行之美乃共立碑一故吏司徒博陵崔烈立一令隴

西抱罕  
等立

漢慎令劉君碑

在穀熟縣門外夫子廟中

漢樂陵令太尉掾許嬰碑

在杯城縣西南

漢光祿勳劉曜碑

并陰在鄆州項城縣

漢彭府君碑

在中都縣

魏兗州刺史李伯茂碑

在曹州

漢帝堯碑

在濟陰縣

漢堯祠祈雨碑

在濟陰縣



漢堯母碑

在濟陰縣

漢劉熙碑

在徐州蕭縣二十五里

漢袁安碑

在子城南門外百步

漢高祖感應碑

在豐縣北延熹十年豐令劉亶立

魏樂安長劉世碑

在彭城縣北

魏羊續碑

在兗州

漢御史大夫鄭君碑

在龔丘縣墓下

漢司徒吳雄等奏孔子廟置卒史碑

漢魯相晨等奏出王家穀祠孔子廟碑在仙源縣建寧二年

魏封議郎孔羨為宗聖侯碑曹植文梁鵠書黃初元年

漢泰山都尉孔宙碑在仙源縣墓前

漢孔彪碑在仙源縣

漢碑永壽三年故婺州從事孔君德於孔子墓祠壇前立在仙源縣

漢孔謙碑

漢司農孔峽碑在仙源縣墓前

漢尚書郎河東太守孔宏碑在仙源二年並建寧元年

漢御史孔翊碑

在仙源縣墓前

漢博士孔志碑

在仙源縣孔子墓東

漢魯相韓勅修孔子廟碑

在仙源縣

漢魯相韓勅復顏氏繇發碑

永壽二年

漢尊士倪壽碑

在仙源縣南七十步魯城內

漢竹邑侯相張壽碑

在單州成武縣城內墓南

漢侯伯咸碑

在單父墓前建寧中立

漢廬江太守范式碑

在濟州任城縣西南四十里大頂山南

漢中郎王政碑

在任城縣墓前

漢司隸校尉魯峻碑

蔡邕書在任城縣墓前

漢少傅何君碑

在任城縣墓下

漢執金吾武榮碑

在任城縣墓下

漢古司馬城鐵碑

在金鄉縣東南四十里云漢浮陽侯司馬耀所封邑

魏太尉滿寵碑

在金鄉縣墓前

漢景君碑二

題云漢故謁者景君益州太守景君碑在任城縣

漢馬援廟碑

漢馬江碑

漢御史大夫邾慮碑

鍾繇書  
在墓前

漢童恢墓雙石闕字

在任城縣南七里一云漢故不  
其令童君一云童恢琅邪人

魏金鄉令徐公碑

在任城縣  
景明一年

漢麟鳳碑

在州  
衙

漢費令田君德政碑

在沂  
州

漢童子逢盛碑

在濰州俗  
云董孝碑

漢孫嵩碑

在密州安丘縣  
西四十里冢前

漢安平相孫君碑

在高密縣西南五十里

魏管寧碑

在安丘縣西南五十里冢前

魏邴原碑

在安丘縣西南四十里墓前

魏孫炎碑并妻碑

在長山縣西南三十里長白山東甘露五年

漢太尉劉寬碑二

在河南府上東門弓手營內門生故吏各一并碑陰

漢石經

尚書論語公羊在張奎龍圖冢

漢司徒掾梁君碑

在襄州穀城縣東四里建安廿七年文字磨滅

漢玄儒先生婁壽碑

在乾德縣勅書樓下

漢山陽太守碑在穀城縣西一里古  
筑城東文字磨滅

郭輔先生碑

不知  
時代

漢筑陽侯相景豹碑在穀城縣  
西一里

漢侍中王逸碑在宜城縣  
南三里

漢南陽太守秦君碑在宜城縣熹平年  
立惟碑首篆字全

漢南陽太守秦君碑在鄧州南陽縣  
字滅惟碑首存

魏章陵太守呂君碑在南  
陽縣

魏受禪碑在潁昌府臨潁縣  
魏文帝廟梁鵠書

漢僕射荀公碑

在長社縣東北  
十里墓前磨滅

漢司隸從事郭君碑

在孟州  
濟源縣

漢北軍中候郭君碑

在濟  
源縣

漢光武皇帝碑

在汝州  
汝墳鎮

漢封觀碑

在項城  
墓前

漢蔡昭碑

在隨州光  
化縣墓前

漢桐栢神碑

在唐州  
延熹中

漢中常侍樊安碑

在縣南門外  
二里許道側



漢中常侍曹騰碑在亳

漢老子銘

在衛真縣太清宮  
邊韶文蔡邕書

魏大饗碑

在譙縣魏文帝廟有陰  
經云曹子建文鍾繇書  
延康元年

漢幽州刺史朱龜碑

在譙縣  
墓下

玄孫伯著碑

在宿  
州

漢楚相孫叔敖碑

在光州固始縣  
西南本廟內

漢秦始皇碑

東海相任恭修理祠  
於碑背刻在朐山

漢東海祠碑

永壽元年東  
海相桓君

漢堂邑令費君碑

在湖州一云烏程并陰

漢梁相費君碑

在州衙字仲慮

漢羅訓墓誌

在衡州耒陽縣南六十里

漢南昌太守谷所碑

在耒陽縣東北

漢青州刺史劉焉碑

在耒陽縣十五里墓下

漢胡騰碑

在耒陽縣南四里

漢羅含誌

在耒陽縣南四里

漢桂陽太守周使君碑

在韶州樂昌縣郭倉丈

漢周公禮殿石楹記在成都府初平五年鍾會書

漢楊侯伯墓碑在犀

墓北

漢王稚子墓闕文在新都縣

都縣

漢析里橋郝閣頌在漢州建寧五年仇子長書名紉在什邡縣

漢廣漢太守沈子瑜碑碑云熹平五年綿竹立

漢馬融墓碣在什邡縣字有磨滅今亡

漢嚴君平廟前碑二在綿竹縣文字磨滅

漢上庸長闕文在德陽縣靈龕鎮

漢刺史李頊碣

在綿州巴西縣今在開元寺文字磨滅

漢張翼碣

在州東四十步

漢中令楊暢墓碑

在嘉州夾江縣東南古賢鄉

漢仙人唐公昉碑

在興元府

漢沛相劔門范皮墓闕文

在劔州梓潼縣東墓前字不甚多記名目而已

漢趙國相雍勸墓石闕文

在梓潼縣東二里墓前

析里橋閣碑

在興州州衙有三段并首

漢王褒墓碑

在資州資陽縣北二十五里墓前文字磨滅

右天下碑錄凡十卷近世不知作者所載多唐人碑  
今刪取其東漢者著于篇魏碑十數予所未見者亦  
附焉姓名舛錯者悉存其故其所謂漢或有三國之  
漢與五胡之漢者其所謂魏疑亦有元魏者非得碑  
不能區別也他日中原復為王土則志古之士可以  
按圖而求之

隸釋卷二十七